



Procez verbal où est inferé le dire de Maistre
Iean Palosse, Prestre.

Contre les Loyolains, soy disants Peres Iesuittes.



An 1665. le dixième iour de Decembre, huit heures de matin ou enuiron, pardeuant nous Charles Amelot, Seigneur de Gournay & autres lieux, Conseiller du Roy en ses Conseils, Maistre des Requestes ordinaire de son Hostel, & President en son grand Conseil, Commissaire en cette partie, en nostre Hostel, scis en la place Royale à Paris, est comparu Maistre André Dumoley, Aduocat & conseil des Peres Iesuittes du College de Clermont en la Ville de Paris, auquel est vnies l'Abbaye de la Couronne, Diocese d'Angoulesme, lequel nous a dit & remonstré auoir en vertu de nostre Ordonnance du iour d'hier, fait donner assignation à Maistre Pierre Cornier & Christophe Bernier, Aduocats & conseils de Maistre Iean Palosse, Prestre, & Charles Galliot, à comparoir pardeuant nous en nostre Hostel, à ce iour & heure, pour dire les causes de refus qu'ils font de passer & signer l'appointement de reglement, qui leur a esté offert de la part desdits Peres Iesuittes en l'instance pendante au Conseil, entre les parties, ce faisant, voir dire & ordonner qu'il sera de nous signé & procedé en outre, ainsi que de raison, aux fins de laquelle ordonnance ledit Dumoley audit nom conclud.

A laquelle assignation est comparu Maistre Iean Palosse, Prestre, Bachelier en Theologie, Prieur de saint Martin lez Nyort, assisté de Maistre Pierre Cornier, son Aduocat au Conseil, qui nous a remontré qu'il empesche la signature de l'appointement offert de la part de

A



Maistre André Dumoley, Aduocat au Conseil, dautant qu'auant passer outre les parties dudit Dumoley demandeurs doiuent iustifier leur qualité, & le pouuoir qu'ils ont d'agir en cette cause: Par ce que cy-deuant ç'a esté toujours sous le nom & qualité du Recteur du College de Clermont, de la Compagnie de Iesus, qu'ils ont agy, tant au Parlement de Paris qu'au grand Conseil. Mais ayans reconnu par le moyen du *Factum* dudit Palosse, seruant de contredits à eux signifié en ladite Instance du grand Conseil, que ce nom de Recteur n'estoit reconnu que dans leur maison particuliere: mais que hors d'icelle, il n'auoit nulle autorité ny droit public, ils ont changé & delaisié le nom titre & qualité de Recteur, & paroissent à present sous le nom, titre & qualité de Peres Iesuittes dudit College de Clermont, auxquels nom, titre & qualité ils sont encore plus mal fondez: Par ce que comme ledit Palosse a aussi fait voir en son dit *Factum*, il est certain que lesdits demandeurs soit Profez, soit non Profez, soit en general, soit en particulier sont incapables de tout droit & action à cause de leurs vœux, & quand bien ils le seroient, ce que non, leur Societé estant vn estat purement Monarchique, qui n'a ny chapitre ny assemblée, & que tout ce qui s'y fait, tant à l'égard du spirituel que du temporel, depend absolument de leur General, qui peut de sa seule autorité casser & reuoker tout ce qu'ils ont fait, consenty ou poursuivy. Il est certain qu'ils ne peuuent agir ny estre en cause, sans auen special, procuration & pouuoir de leur General: C'est pourquoy, afin que ladite procedure soit valable & en forme, ledit Palosse soustient qu'ils ne peuuent estre en qualité, ny faire aucune demande ny action en cette Instance, qu'ils n'ayent au prealable fait foy & communiqué Procuration de leur General, speciale à ces fins.

Et de plus, la qualité qu'ils ont pris de Peres Iesuittes est vne qualité qui ne leur a iamais esté accordée, ains au contraire leur a esté tres-expressement prohibée & defendue par des authoritez legitimes. Car soit qu'on considere la Bulle de confirmation de leur Institut ou le Concile de Trente, ou les assemblées des Euesques de France,

ou les Arrests des Parlemens, ou les Decrets de la Sorbonne, ou leurs propres actes, qui sont les lieux & occasions où ils auroient deu exprimer, & les personnes qui leur auroient peu donner & accorder leurs veritables noms titres & qualitez : Il est toutesfois certain que cette qualité de Peres Iesuittes ne leur a iamais esté donnée ny accordée. Car

En premier lieu, dans la premiere Bulle confirmative de leur institut, donnée par le Pape Paul III. le 27. Septembre 1540. en laquelle est inserée la Formule de leur institut, ils n'ont pas pris, ny le Pape ne leur a pas donné cette qualité de Peres Iesuittes : Ce qui paroît par ladite Formule, laquelle commence en ces termes. *Quicumque in Societate nostra quam Iesu nomine insigniri cupimus, vult sub crucis vexillo Deo militare, & soli Domino atque Romano Pontifici eius in terris Vicario servire.* Tous lesquels mots sont remarquables : Car par les premiers *in Societate nostra*, c'est à dire en nostre Compagnie, il est clair, que c'est donc vne Compagnie de certains hommes qui s'estoient assemblez, venus de Biscaye, ou Guypuscoa, de Nauarre, des deux Castilles, de Geneve, de Portugal & de Sauoye, & quoy qu'il y en eust vn de François; à sçauoir, Pasquier Brouet d'Amiens, si est ce qu'il ne s'en voulust pas dire parmy tant d'Espagnols, ce qui rendroit la moindre prouision de Benefice nulle & subreptice, à combien plus forte raison vne confirmation d'un Ordre & Institut. D'où il s'ensuit, que ce n'estoit donc pas la Compagnie de Iesus, ny qu'ils ne l'appelloient pas mesmes ainsi, parce que suivant lesdits termes, on n'eust peu dire, que *Societas nominis Iesu*, comme l'on dit communement, la Confrerie du nom de Iesus: mais non pas simplement *Societas Iesu*, n'ayans lesdits demandeurs pour lors osé se donner ce titre en ces termes, ce qu'ils font neanmoins à present, & ce qui ne se peut proprement dire qu'avec temerité & presumption.

Car nostre Seigneur Iesus: Christ, ny comme Dieu, ny comme homme, ny comme Dieu & homme, & auteur de l'Eglise, n'a pas eu de compagnons. Comme Dieu, il n'est pas probable que lesdits demandeurs pretendent estre ses

Compagnons, & auoir part à la Diuinité, & ainsi estre complices du crime & de l'insolence de Lucifer, pretend-
 dant estre semblable & compagnon au Tres-haut. Comme
 homme il n'en a non plus eu, puis qu'il est le seul nay d'v-
 ne Vierge & sans peché, ce que probablement aussi lesdits
 demandeurs ne pretendent pas. Comme Dieu & homme
 auteur & instituteur de l'Eglise non plus, puis que luy
 seul est l'vnique Redempteur des hommes, & la seule pier-
 re fondamentale de l'Eglise, comme dit saint Paul: A quoy
 on ne peut non plus croire, que lesdits demandeurs veül-
 lent auoir part. Comme quoy doncques peuuent lesdits
 demãdeurs pretendre d'estre compagnons de Iesus-Christ?

Et ne leur peut de rien seruir le passage de saint Paul,
adimpleo ea que disunt passionum Christi, parce que saint
 Paul ne l'a pas dit, *ut socius sed ut seruus*, qualité qu'il prend
 si souuent dans ses Epistres, & que mesmes ny luy ny aucun
 des autres Apostres ne se sont iamais dits ses Compagnons,
 ny nostre Seigneur ne les a iamais appelez de la sorte, ny
 honorez de ce titre. Et ne peuuent non plus lesdits deman-
 deurs se dire tels, parce qu'il est dit par saint Paul, écriuant
 aux Corinthiens, *fidelis Deus per quem vocati estis in societatem*
Filij eius Domini nostri. D'autant qu'en ce passage ce mot de
Societas, au texte Grec original est exprimé par ce mot
~~κοινωνία~~, qui ne veut pas dire proprement *Societas* ou *soda-*
litas, ainsi que le prennent lesdits demandeurs, parce que
 S. Paul se fust seruy du mot Grec *εταίρις*, qui signifie *sodi-*
litas ou *sodalitium*, au lieu duquel il s'est seruy de celuy de
~~κοινωνία~~, qui veut dire proprement *communio* ou *communi-*
tas: Ayant voulu par là signifier la vocation des fideles en
 la communion, communauté ou Royaume de Iesus-
 Christ, & non pas en société, compagnie ou sodalité avec
 Iesus-Christ, ainsi que pretendent lesdits demandeurs:
 Ny ne peut leur seruir de ce que saint Paul dit en l'Epistre
 aux Philippiens, *societatem passionum illius*, S'entend *Christi*,
 par ce que de cette façon cela n'est nullement iniurieux à
 Dieu ny à Iesus-Christ, comme vn Soldat ou vn Escolier,
 se peut dire compagnon de guerre, de voyage ou d'estu-
 de de quelque autre de condition plus releuée que luy ou

du Prince mesme ; mais pour cela , il ne peut sans temerité criminelle , se dire simplement & absolument compagnon de son Roy , parce que suivant le Prouerbe , qui a de compagnon a de maistre. Or les Rois & les Souuerains ne peuuent souffrir d'égal ny de compagnon en leur Souueraineté , sans la perdre & sans souffrir vne notable iniure. Et sicela a lieu , & est vray à l'égard des Rois & des Souuerains de la terre , à combien plus forte raison à l'égard de Dieu & de nostre Sauueur Iesus-Christ. Et ce d'autant plus qu'il l'a expressement deffendu en l'Exode chap. 20. disant *non assumes nomen Domini Dei tui in vanum* , ou bien iemere , selon le texte Hebreu , *nec enim habebit in sortem Dominus eum qui assumpsit nomen Domini Dei sui frustra*. Ce qui se doit entendre non seulement du nom & titre de Dieu : mais aussi de celuy de nostre Sauueur Iesus-Christ , qui est Dieu , & duquel saint Paul a dit , que *dedit illi nomen quod est super omne nomen* , & par consequent incommunicable. De sorte que par là , l'on void que si dans l'Estat Politique on ne peut souffrir de pair & de compagnon , au nom & titre de Roy ; cela ne se peut ny ne se doit non plus souffrir dans le Spirituel & Ecclesiastique , à l'égard de celuy de Iesus , qui veut dire Sauueur , & qui est vnique & particulier à nostre Souuerain , & seul Sauueur Iesus-Christ. Que si par ce mot de Compagnie lesdits demandeurs entendoient d'estre à la suite de Iesus-Christ , cela seroit tolerable. Mais l'entendant & le disant mesme de Societé , ce qui emporte égalité & parité , cela ne se peut Chrestiennement souffrir.

Ensuite ils adioustent dans ladite Formule , *quam Iesu nomine insigniri cupimus* , que nous desirons ou voulons estre marquée du nom de Iesus. Où premierement il est à remarquer qu'ils ne disent pas au Pape , *supplicamus. petimus* ou quelque mot semblable d'humilité ; mais *cupimus* , leur semblant assez suffisant d'obtenir tout , pourueu qu'ils le desirent. En second lieu , ce mot d'*insigniri* est à considerer , lequel ne veut pas dire nommer ou appeller simplement , parce qu'il faudroit auoir mis *vocari aut nominari* ; mais a vne signification plus releuée , comme si on vouloit dire ,

magnificari vel separari à reliquis, laquelle signification se reconnoist plus clairement, lors qu'on dit de quelqu'un *vir insignis*, par laquelle Epithete on ne veut pas luy donner vne denomination ou nom propre; mais seulement marquer son excellence & qualité releuée par dessus les autres; c'est pourquoy lesdits demandeurs ne peuuent pas dire que ce titre leur soit vn nom & denomination; mais seulement vne marque d'honneur & de prerogative, comme sont les armes & blasons dans les familles & maisons nobles, à l'exemple desquelles lesdits demandeurs se sont attribuez à eux mesmes ce nom & titre glorieux, & mis dans leurs armes & cachets comme s'il leur estoit propre & particulier, au preiudice du reste des fideles & Ordres Religieux qui s'en sont abstenus par respect.

Il s'ensuit dans leur dite Formule d'institut, *sub crucis vexillo Deo militare*. Guerroyer à Dieu sous l'estendart de la Croix: Lesquels mots sous l'estendart de la Croix, à leur égard sont assez surprenans; car qui est ce qui aye encore veu cet estendart de la Croix, sous lequel lesdits demandeurs marchent? Du moins ledit Palosse ne l'a iamais veu ny personne de ceux avec lesquels il s'en est informé: De sorte que, quoy que tous les autres Ordres tant Reguliers que Seculiers, & toutes les dignitez & communautéz Ecclesiastiques, portent ou fassent porter deuant eux la Croix. Eux seuls n'en ayans point ou n'en portans point, ils ne deuoient pas mettre ny se vanter de l'estendart de la Croix. Et ce d'autant plus, que non seulement ils ne la portent point, qu'au contraire ils la rejettent & la repoussent, ne voulans point permettre que la Croix, ny des Euesques, ny des Curez entrent dans leurs maisons, ny dans leurs Eglises, au detrimement des honneurs & droits Episcopaux & Curiaux, & au scandale public, comme il n'est arriué que trop souuent, mesme dans Paris.

Après ils adjoustent, & *soli Domino atque Romano Pontifici eius in terris Vicario seruire*. Et seruir au seul Seigneur & Pontife Romain son Vicaire en terre. Entre lesquels mots les premiers sont remarquables, *soli Domino* seul Seigneur. Par lesquels ils veulent dire, que le Pape estant

le Vicairé de Dieu en terre. (Car ils ne disent pas de Iesus Christ, duquel pour ce regard il n'est pas parlé auparavant.) Et que comme Dieu est souuerain, sans contredit, dans l'Vniuers, & que le Pape est son Vicaire en terre, il s'ensuit que le Pape est donc le seul Seigneur dans l'Vniuers, & par ainsi qu'il a vne puissance absoluë, & au Spirituel & au temporel par dessus tous les hommes, & sur tous les Princes & Rois de la terre, comme tous soumis à Dieu, duquel ils le disent seul Vicaire, & tenant sa place & autorité sur la terre. Que si cela a lieu, il ne peut estre que toutes les Couronnes, Royautez & Souuerainetez, tant Chréstiennes que des Heretiques, mesmes des Infideles ne soient soumises au Pape, puis qu'elles le sont à Dieu, duquel ils le disent le seul Vicaire & Lieutenant en terre. C'est pourquoy le Parlement de Paris, par son Arrest du 3. Aoust 1554. sur la presentation faite de ladite Bulle par lesdits demandeurs pour estre receus en France, iugea tres-bien qu'auant passer outre, lesdites Bulles seroient communiquées à Monsieur l'Euesque de Paris, & à la Faculté de Theologie de ladite Ville, y reconnoissant qu'il y auoit beaucoup de choses contraires aux *Canons de l'Eglise*, aux libertéz de l'Eglise Gallicane, & à l'autorité & souueraineté du Roy, & comme de fait il y fut réglé, tant par l'Assemblée de Poissy, que par les Arrests de la Cour. Aquoy ledit Palosse ne s'arreste pas dauantage, luy suffisant d'auoir fait voir que par la Formule de leur propre institut, & par la premiere Bulle confirmatiue d'iceluy, ladite qualité & titre de Peres Iesuittes n'auoit esté par eux prise, n'y à eux donnée par le Pape.

En second lieu, au Concile de Trente, ce titre & qualité de Peres Iesuittes ne leur a esté non plus donné ny accordé par ledit Concile, quoy qu'ils se vantent que leur Compagnie aye esté approuuée & confirmée par iceluy : Car ledit Concile dans la session 25. chap. 16. de *Regularibus & Monialibus*, dans lequel lieu seulement il parle desdits demandeurs, il dit en ces termes *per hac tamen*, ayant parlé cy-deuant de la reformation des autres Ordres Religieux, *sancta Synodus non intendit aliquid innouare aut pro-*

hib re quin Religio Clericorum Societatis Iesu iuxta pium eorum institutum à sancta Sede Apostolica approbatum Domino & eius Ecclesie inseruire possint. Par lesquelles paroles on voit, que le Concile n'a fait que tolerer, & n'entendre empescher par respect du saint Siege cette Religion des Clercs de la Compagnie de Iesus, titre que ny le Concile ny mesme le Pape, (puisqu'il dans toute la Bulle confirmative de leur institut, cette Societé n'est appelée que *Societas nostra, Societas huiusmodi* & semblables, & iamais simplement *Societas Iesu.*) Mais eux mesmes se donnoient, & ainsi le Concile s'est comporté, c'est à dire quant à la façon d'agir seulement à leur égard, & à l'égard du respect deu au saint Siege, tout de mesme qu'on fait en France, à l'égard de la Religion pretenduë Reformée, laquelle on tolere & on n'empesche point par consideration & respect du repos public, & ainsi on ne peut tirer dudit Concile aucune consequence qu'il ait approuvé ou confirmé ledit institut, ny leur dit titre & qualité non plus qu'en France, on ne peut tirer consequence d'approbation ou confirmation de la Religion pretenduë Reformée, sous pretexte qu'on la tolere ou qu'on ne la prohibe point.

Mais ce qui est de remarquable dans les termes dudit Concile est, que le Concile les appelle *Religio Clericorum*, la Religion des Clercs, & parce que ce mot de Clerc leur a semblé trop bas & vil, ils l'ont laissé & pris celui de Peres, comme plus auguste & venerable. Surquoy il faudroit que puis qu'ils sont deuenus Peres, ils iustificassent comment & où sont leurs enfans; car cette qualité & titre de Pere n'appartient en l'Eglise, que premierement au Pape par excellence, d'où vient qu'on l'appelle ordinairement tres-saint Pere, ou nostre saint Pere le Pape. Puis à Messieurs les Archeuesques & Euesques, ainsi qu'il paroist par la Formule de leur prouision, laquelle est conceuë en ces termes. *Præuidemus Ecclesie tali de tali persona & præficimus eam in patrem & pastorem ac Episcopum eiusdem Ecclesie.* Et enfin à Messieurs les Curez & Pasteurs des Parroisses, parce que ce sont eux qui donnent la naissance par le Baptême, la nourriture par l'Eucharistie, & par la parole de Dieu
ordinaire

ordinaire & reglée *iure proprio & ex officio*, & la propagation des fideles par la benediction du mariage. Or les demandeurs ne donnent ny naissance ny nourriture ny propagation, & par ainsi ne peuuent s'attribuer ce titre. Que si ils alleguent qu'ils donnent le Sacrement de Penitence & d'Eucharistie & la parole de Dieu : Ils ne peuuent pas pour cela s'attribuer ce titre, parce que ce que le Prestre fait dans le Sacrement de Penitence est vne action de Iuge qui absout ou condamne, & par ainsi ils n'en peuuent prendre que la qualité de Iuge, & parce que lesdits demandeurs ne le font pas *authoritate ordinaria, sed delegata tantum*, ils ne se peuuent dire que Commissaires, soit du Pape ou des autres qui leur en donnent le pouuoir, par l'administration de l'Eucharistie non plus, parce qu'on sçait bien que cette administration principalement hors de la maison ou Eglise propre, qui est la Paroisse, estoit autrefois en l'Eglise primitiue faite par les Diacres, comme le iustifient clairement les Actes du Martyre de saint Laurens Diacre, qui disoit au Pape Sixte parlant de soy mesme, *cui commissi Dominici Corporis & Sanguinis dispensationem*, & qui pour ce ne se disoient pas Peres, c'est pourquoy lesdits demandeurs ne pourroient non plus se dire que Diacres ou Ministres si bon leur semble, ny non plus ne peuuent lesdits demandeurs, se dire Peres à cause de la parole de Dieu qu'ils preschent, parce que c'est dans la Paroisse où cette parole de Dieu estant distribuée reglement, & *ex officio*, aux Prosnes, Cathechismes ou autrement, c'est la propre & naturelle nourriture des fideles & leur pain quotidien, au lieu qu'ailleurs, ce n'est que comme les repas qu'on fait és maisons estrangeres par extraordinaire, à cause desquels ceux qui inuitent ne peuuent pour cela se dire ny Peres ny nourrisiers, ains au plus amis & en quelque façon interessez, parce qu'ils s'en recompensent en effet ou en seruices. Que si par erreur populaire ou par respect on leur donne cette qualité de Peres, on le supporte volontiers: mais que lesdits demandeurs mesmes, lesquels on ne peut dire sans leur faire affront, pecher par ignorance ou par simplicité, se l'attribuent & s'approprient ce titre & qua-

lité qu'aucun des autres Ordres Religieux n'a osé se l'attribuer, puis que ny l'Ordre de saint Dominique, ny de saint François, ny mesmes de saint Benoist, ny de saint Augustin, qui seroient leurs Peres par antiquité, & qui ont les mesmes priuileges & fonctions dans l'Eglise qu'eux, & qui ne se sont neanmoins iamais dits ny qualifiez que Freres, comme Freres Prescheurs ou Freres de saint François, & ainsi des autres, cela ne se peut prendre que pour vne entreprise contre les titres & qualitez du Pape, des Euesques & des Curez, & pour vne ambition insupportable desdits demandeurs, d'eminence & d'excellence par dessus tous les autres Ordres Religieux dans l'Eglise.

En troisieme lieu; En l'assemblée de Poissy, ce titre & qualité de Peres Iesuittes ou Peres de la Compagnie de Iesus, bien loin de leur auoir esté accordé par Messieurs les Prelats de l'Eglise Gallicane assemblez en Concile National audit Poissy, où lesdits demandeurs s'estoient presentez en 1561. pour estre receus en France, qu'au contraire il leur a esté tres-expressement deffendu. Ce qui est clairement iustifié par l'acte de ladite assemblée tenuë audit Poissy, le Lundy 15. Septembre 1561. lequel est conceu en ces termes: L'assemblée suiuant le renuoy de ladite Cour de Parlement de Paris, a receu & reçoit, a approuué & approuue ladite Societé & compagnie par forme de Societé & College, & non de Religion nouvellement instituée, à la charge qu'ils seront tenus prendre autre titre, *que de Societé de Iesus ou de Iesuittes*, & que sur icelledite Societé & College, l'Euesque Diocesain aura toute superintendance, iurisdiction & correction de chasser & oster de ladite Compagnie les forfaitteurs & mal viuans, n'entreprendront *les Freres* d'icelle Compagnie, & ne feront en spirituel ny en temporel aucune chose au prejudice des Euesques, Chapitres, Cures, Parroisses & Vniuersitez, ny des autres Religions, ains seront tenus de se confirmer entierement à la disposition du droit commun, sans qu'ils ayent droit ny iurisdiction aucune, & renonçans au prealable, & par expres à tous Priuileges portez par leurs Bulles aux choses susdites contraires, autrement & à faute de

ce faire, ou que pour l'aduenir ils en obtiennent d'autres, les presentes demeureront nulles & de nul effet & vertu, sauf le droit de ladite assemblée & l'autrui en toute chose. D'où se iustificient clairement deux veritez ; La premiere que leur reception en France est censée reuokée & nulle, par ce qu'ils n'ont en rien satisfait aux conditions contenues en l'acte de leur reception, ains au contraire contreuenue en tous points & articles : La seconde, qu'ils sont tres-mal fondez en leur prétendu titre de Peres Iesuittes, ou de la Societé de Iesus, puis qu'ils n'ont esté receus en France par le Clergé, qu'à la charge de quitter ce nom là, & d'en prendre vn autre, de laquelle assemblée ils ne se sont iamais plaints ny appellé, ains en ont demandé l'exécution & enregistrement au Parlement de Paris, & pour ce en ce point sont sans repliche.

En quatrième lieu, par les Arrests des Parlemens ce mesme titre & qualité de Peres Iesuittes ou Societé de Iesus leur a esté encore osté & deffendu. Et ce par plusieurs Arrests de diuers Parlemens de France, comme par celuy de Tolose du 14. Fevrier 1561. & de Paris du 9. Iuin 1584. mais principalement par celuy du Parlement de Paris, du 30. Fevrier 1561. par lequel il est porté expressement, que l'acte de leur reception & approbation faite à Poissy, duquel lesdits demandeurs mesmes requeroient l'enregistrement, seroit enregistré au Greffe de la Cour, & suiuant iceluy que leur Societé seroit receuë par forme de Societé & College, qui sera nommé le College de Clermont, & aux autres charges & conditions contenues en leurs declarations & esdites lettres d'approbation de ladite assemblée de Poissy. Apres quoy il y auroit à la verité de quoy s'estonner, comme quoy apres toutes ces authoritez legitimes, & qu'ils ont eux mesmes reconnues & receues, ils méprisent le tout à present, & contreuiennent directement & positivement à ce qui leur auoit esté expressement deffendu par ladite assemblée de Poissy, & Arrests des Parlemens, si on ne sçauoit que se voyans impunis de leurs entreprises, ils sont en possession de ne considerer que leur interest & ambition.

En cinquième lieu, par la Sorbonne ce mesme titre & qualité a esté trouué si extraordinaire que ladite Sorbonne, à laquelle lesdits demandeurs auoient esté renuoyez par Arrest du Parlement de Paris, du 3. Aoust 1554. auant la verification de leurs Bulles & Statuts, pour leursdites Bulles estre communiquées & veuës par icelle Sorbonne, que ladite Sorbonne & Faculté de Theologie de Paris, par son auis ou conclusion du premier Decembre 1554. apres auoir diuerses fois par plusieurs mois leu & considéré tres-diligemment les Bulles des Papes Paul III. & Iules III. & apres les protestations, des respects & soumissions deuës ausdits Papes & au saint Siege; d'vn commun consentement auroit donné son sentiment en ces termes: Cette nouuelle Societé qui s'attribuë particulierement ce titre inusité du nom de Iesus, qui reçoit indifferemment & si licentieusement toute sorte de personnes, quelques méchantes & illegitimes qu'elles soient, ne differant en aucune façon des Prestres seculiers en habit exterieur, en la tonsure à reciter les Heures canoniques, soit en particulier, soit publiquement, en Eglise ny en Cloistre, ou silence, en obseruation, & choix des viandes & des iours, & autres diuerses loix & ceremonies, par lesquelles l'Estat des Religions est distingué & conserué, à laquelle ont esté donnez tant & si diuers priuileges, indults & libertez, principalement en ce qui concerne l'administration des Sacremens de la Penitence & de l'Eucharistie, & ce sans aucun égard & difference des lieux ou des personnes, pareillement en la fonction de prescher, lire & enseigner au prejudice des Ordinaires & de l'ordre Hierarchique, aussi au prejudice des autres Religions, voire mesmes des Princes & Seigneurs temporels, contre les Priuileges des Vniuersitez, enfin à la grande oppression & foule du peuple, semble violer l'honneur de la Religion Monastique. Enerue l'exercice honnestes, pieux & tres necessaire des vertus, des abstinences, des ceremonies & austeritez. Mais d'auantage donné occasion de librement sortir & se faire Apostat des autres Religions. Oste & soustrait l'obeissance & subjection deuë aux Ordinaires, priue injustement les

Seigneurs tant temporels qu'Ecclesiastiques de leurs droits, apporte du trouble en l'vne & l'autre police, plusieurs dissensions, plaintes parmy le peuple, plusieurs procez, débats, contentions, ialousies & diuers schismes. Partant toutes choses & autres diligemment examinées & considérées, cette Societé semble perilleuse au fait de la Foy, perturbatrice de la Paix de l'Eglise, & tendre à renuerfer la Religion Monastique, & plus propre à destruire qu'à edifier. C'a esté le sentiment de la Sorbonne, il y a cent ans : mais suiuant iceluy, comme quoy les doit-on appeller, quel nom leur doit-on donner ? Ledit Palosse s'en rapporte au public : mais ce qui est à remarquer, c'est que ce Decret ou sentiment de la Sorbonne & Faculté de Theologie de Paris, a esté si fascheux & si fort graué dans l'esprit desdits demandeurs, qu'ils n'ont depuis cessé de luy faire à diuers temps & diuerses reprises, des procez & des troubles continuels, ny ne cessent encore à present par pratiques & menées secretes, faire tout ce qu'ils peuvent pour la perdre & la decrediter, soit en son corps, soit en ses membres, tant dedans que dehors le Royaume, ce qu'ils auroient dé-jà fait entierement, si Sa Majesté & la Cour de Parlement, ne l'eust secouruë par leur iustice & autorité.

En sixième lieu, par leurs propres actes. Dautant que si l'on demande enfin ausdits demandeurs mesmes : Dites nous, qui estes vous, comment vous appelez vous, *tu quis es, quem te ipsum facis* ? Estes vous Religieux ne l'estes vous pas, & enfin quel est vostre nom : Ils respondront sans doute, ce qu'ils respondirent par la declaration qu'ils firent en 1564. à l'Vniuersité de Paris, qui leur faisoit pareilles questions.

Pour la question de Religieux : Ils diront qu'ils sont Religieux & qu'ils ne le sont pas ; c'est à dire qu'ils sont Religieux Problematicques, *est, non est*, prenez tel qu'il vous plaira : Si vous voulez soustenir qu'ils ne sont pas Religieux : Ils diront que cy, parce qu'ils viuent en commun sous certaines Regles & constitutions, & allegueront à ces fins la Bulle du Pape Gregoire XIII. du 25. May 1584.

qui excommunie tous ceux qui diront le contraire. Voulez vous soustenir qu'ils sont Religieux, ils diront que non, comme ils dirent pour lors, du moins comme les autres Religieux qu'ils ne sont pas dignes de professer vn si saint & parfait genre de vie, & aussi que les non Profez en comparaison des Profez ne sont pas Religieux de la Societé. Que si cela choquel'esprit & la raison, ils diront encore comme pour lors qu'ils disputeront de cette question, quand & en quel iugement ou iustice qu'il vous plaira & qu'ils ne peuvent pas, quoy qu'ils le veüillent tres-fort, répondre plus distinctement & explicitement à la question qui leur est proposée. De sorte, que par cette réponse on ne peut conclure, s'ils sont Religieux, ny s'ils ne le sont pas, ny tirer aucune consequence, si ce n'est qu'ils sont, non pas d'un Ordre; mais d'une Religion differente de celle des autres Religieux, & mesmes les non Profez de celle des Profez. Mais quelle Religion c'est, ils ne le disent pas & ne le veulent pas dire. Et en effet, quoy qu'ils disent auoir Regles & Statuts ou constitutions, ils n'en ont point toutesfois, du moins de certaines & asseurées, parce que par vne de leur Regles & constitutions, ils peuvent changer toutes les autres faites & à faire. *Et tam haftenus factas quam in posterum faciendas constitutiones ipsas iuxta locorum aut rerum qualitatem mutare, alterare, seu in totum cassare & alias de nouo condere possint & valcant*, & par ainsi celle-là seule cassant & destruisant la stabilité des autres, ils n'en ont point en effet, puis qu'ils peuvent n'en auoir point, quand bon leur semble, & ainsi Religieux sans Regles.

Pour la question de leur nom, ils n'en sont point plus certains; car ils en ont changé si souuent, qu'on ne sçait à quel s'arrester; car en 1540. en la Bulle du Pape Paul III. ils se disent nostre Compagnie. Dans les Lettres patentes mentionnées es conclusions de Messieurs les Gens du Roy, prises & portées au Parlement de Paris, le 26. Ianuier 1552. par M^r l'Aduocat General Segulier, ils se disent, la Congregation des Iesuittes. Dans les Lettres patentes contenuës en l'Arrest du Parlement de Paris, du 3. Aoust 1554. ils se

disent les Prestres & Escoliers de la Societé de Iesus-Christ. Dans les Lettres patentes contenuës en l'Arrest du Parlement de Paris, du 18. Nouembre 1560. ils se disent Ordre & Religion de la Compagnie de Iesus. Dans la Requête par eux présentée à l'assemblée de Poissy en 1561. pour estre receus en France, ils se disent Freres de la Societé du nom de Iesus. Dans les Lettres patentes contenuës en l'Arrest du Parlement de Paris, du 30. Fevrier 1561. ils se disent les Religieux Prestres & Escoliers de la Compagnie & Societé de Iesus, & par ledit Arrest ils sont obligez à changer de Nom, & se dire & nommer le College de Clermont. Dans le Concile de Trente, en la session 25. chap. 16. de *Regularibus & Monialibus*, tenuë les 3. & 4. Decembre 1563. ils se disent la Religion des Clercs de la Societé de Iesus. En la Requête par eux présentée au Parlement de Paris, & responduë le 26. Fevrier 1564. ils se disent les Religieux Prestres & Escoliers de la Societé & Compagnie du College de Clermont supplians, attendu qu'ils ont esté receus à l'assemblée de Poissy par forme de Societé & College & non de Religion, & qu'ils prendroient autre nom, que de Societé de Iesus ou Iesuittes, & que par Arrest de la Cour du 30. Fevrier 1561. ils sont receus par forme de Societé & College qui sera nommé le College de Clermont, & qu'ils ont acquis vne maison à Paris, &c. Dans cette Instance au Parlement de Paris, & au grand Conseil, ils se sont dits le Recteur du College de Clermont de la Compagnie de Iesus. En cette mesme Instance au Conseil, ils se disent à present les Peres Iesuittes du College de Clermont estably en cette Ville de Paris, & ce contre les anciennes deffences. Par tous lesquels changemens de noms, on voit l'incertitnde & difficulté qu'il y a de les nommer ny de les connoistre. Et ce qu'il y a à remarquer en cette inconstance est, qu'encore qu'il semble qu'ils ayent esté beaucoup attachez à retenir letitre & nom de Iesus: neanmoins lors que pour leur interest pour pouuoir estre receus en France, par Ordonnance d'vne assemblée du Clergé, & vn Arrest du Parlement de Paris, il l'a fallu quitter, ils ont bien-tost lasché le pied,

& abandonné ce beau titre & nom de leur Capitaine, à ce qu'ils disoient pour se contenter de celuy d'un simple College, du moins pour vn temps, s'accommodans au temps & lieux pour leur interest.

Que si à present lesdits demandeurs ne se seruent plus de ces noms; sçauoir, ny de Religion de Clercs, comme trop bas à eux qui sont Prestres, & qui se disent grands Predicateurs en l'Eglise, ny d'Escoliers, comme indigne d'eux, qui sont les Docteurs de la Loy, & se pretendent infallibles en leur doctrine, & que ceux de Peres, ny de Iesuittes, ny de Compagnie de Iesus, ne leur peuuent estre donnez pour les raisons susdites, & pour leur auoir esté prohibez. Comme quoy les pourra appeller ledit Palosse, qui a affaire à eux, comme à ses parties: Il a creu qu'il ne pouuoit prendre vn nom plus propre & conuenable, que de nommer cette Compagnie du nom de son Autheur; à sçauoir, la Compagnie d'Ignace. Mais parce qu'il y a dans l'Eglise vn autre grand Saint du mesme nom; sçauoir, Ignace troisième Euesque d'Antioche, apres saint Pierre, pour ne confondre leurs noms, & que leur Autheur auoit le surnom de Loyola pour les distinguer, & leur donner vn nom propre & particulier, puis qu'ils ont rejeté tous ceux qu'ils auoient pris ou qui leur auoient esté donnez, & que ceux qu'ils prennent à present ne leur sont pas propres ou leur ont esté deffendus, & qu'il en faut vn nouveau, le nom le plus conforme est de tirer vn nom patronimique & deriuatif de leur Autheur, & les appeller la Compagnie de Loyola ou les Loyolains ou Loyolastes.

Mais ce qui est encore plus considerable, que tout le contenu cy-dessus est, que ledit Palosse soustient que lesdits demandeurs ne peuuent en aucune façon agir en cette cause, parce qu'ils ne le peuuent que ou sous le nom & autorité de ceux de la maison Professe, & de leur General qui ont l'absoluë administration de leur Societé, ou sous leur nom & autorité propre, ou sous le nom d'un principal Ecclesiastique, Superieur audit College. Ils ne le peuuent pas sous le nom dudit Principal du College, suivant l'institution & l'ordre que feu M^r l'Aduocat general Dumesnil,

Dumesnil, plaidant au Parlement de Paris, auoit voulu establir audit College de Clermont, pour les regler à la forme des autres Colleges de l'Vniuersité, y établissant vn Principal Ecclesiastique & des Bourses pour lefd. Escoliers de leur Societé, attendu que le corps de leur Societé & Religion, n'estant pour lors receu en France, ils ne pouuoient y estre establis en autre façon, & en cette qualiré ils ne le peuuent pas, parce qu'ils n'ont pas voulu se conformer audit Reglement. Ils ne le peuuent pas aussi sous leur nom propre, parce qu'ils sont incapables de tous droits par leurs vœux, & qu'ils ne font point Communauté propre, comme ledit Palosse a fait voir en son *Factum*, & qu'ils sont absolument & au Spirituel & au temporel, dependans de ceux de la maison Professe & de leur General, & ne le peuuent enfin non plus sous le nom dudit General, ny maison Professe, non seulement à cause des vœux desdits Profez, tant en commun qu'en particulier, comme ledit Palosse a fait voir en sondit *Factum* : mais principalement, parce que leur Religion & corps de maison Professe, n'a esté iamais receuë en France, ny par le Clergé, ny par les Parlemens, ny par le Roy, qui n'ont iamais verifié ny approuué leurs Bulles ny constitutions. Car depuis leur erection en forme de Societé, Compagnie ou Religion, ils ne scauroient faire voir la verification & enregistrement au Parlement, la reception en quelque assemblée du Clergé, ny l'authorisation par Lettres patentes du Roy de leurs Bulles confirmatiues de leur institut. Car l'assemblée de Poissy du 15. Septembre 1561. les reçoit en forme de Societé & College & non de Religion, & par ainsi n'approuue point leurs Bulles ny institut. L'Arrest du Parlement de Paris, du 30. Fevrier 1561. suit la resolution de ladite assemblée, & depuis tous les autres Arrests, tant du Parlement de Paris que des autres Parlemens de France, n'ont fait que suivre & se conformer au susdit. Par les Lettres patentes du Roy Henry IV. de Septembre 1603. de leur reestablishement en France, il leur est simplement accordé de demeurer es lieux où ils se trouuoient lors establis en France, & par grace en faueur de Sa Sainteté de se remettre es Vil-

les de Lyon, Dijon & la Fleche, sous les conditions y exprimées, & notamment de ne pouuoir dresser College ny residence ailleurs, sans expresse permission du Roy. Par les autres Lettres patentes dudit Henry I V. du 27 Iuillet 1606. il leur a esté accordé, comme auparauant il auoit fait verbalement, de rentrer à Paris, & se remettre en la maison Professe, & y faire leurs fonctions suiuant ladite permission verbale, & audit College de Clermont, excepté toutesfois lecture publique & autres choses scholastiques. Quant aux autres Lettres patentes qu'ils ont obtenues depuis, par surprise des feux Rois Henry I V. Louis X I I I. ou de Sa Majesté à present regnant, elles ne regardent que le fait des lectures ou choses scholastiques, en faueur de leurs Colleges, ou pour dons & pour euocations generales ou particulieres; mais pour le fait de leurs Bulles & institut, confirmation & homologation d'icelles, ils n'en scauroient faire voir aucune, & ainsi leurs residences en France en qualité de Religion, n'ayant point esté autorisées par des Lettres patentes verifiées aux Parlemens, sont vne espeece d'entreprise contre les Loix de l'Estat.

Mais dira-t-on, comme quoy doncques sont-ils en France? A quoy il est aisé de respondre, à condition qu'on soit tant soit peu versé dans l'Histoire des troubles de la France, depuis les questions de la Religion & la naissance de la Ligue, qui ont causé tant de desordres en cet Estat au dernier siecle. Ce que ledit Palosse rapporte par necessité, pour la deffence de sa cause, & pour faire voir l'introduction ou intrusion desdits demandeurs en France: Et on remarquera, que les demandeurs estans venus en France, en 1561. ils n'y furent au commencement receus qu'en forme de Societé & College & non de Religion, n'y ayans ny pouuant auoir de maison Professe, comme eux mesmes reconnurent en la Declaration qu'ils baillerent à l'Vniuersité de Paris en 1564. en laquelle parlans de leurs maisons Professes, ils disent *verumtamen ea pars de leur Societé in Gallia non est recepta*: mais comme les troubles s'augmenterent, & que lesdits demandeurs estans montez es Chaises,

se firent entendre, & se porterent vigoureusement non seulement pour la Religion; mais principalement pour le soustien & auancement de la Ligue, contre les feux Rois Henry III. & Henry IV. puis que ce fut vn desdits demandeurs nommé Claude Mathieu, qui fut enuoyé à Rome, au Pape Gregoire XIII. pour la luy presenter, luy donner sa Benediction & autoriser ladite Ligue, & vn autre desdits demandeurs nommé Odo, fust choisi par les seize Conjurez de Paris pour estre leur chef, à la faueur desquels troubles & de ladite Ligue, en laquelle ils estoient les principaux & les plus confiderez, il leur fut facile de s'introduire dans Paris, & dans le reste des principales Villes de France, sans aucune formalité, & sans respecter aucune autorité, ny du Roy, ny du Clergé, ny des Parlemens: mais à present qu'on peut en seureté examiner leurs titres, ils ne sçauoient en faire voir de bons & legitimes de leur reception en France, & par ainsi ne peuvent estre ~~en~~^{ous} en iustice ny contester en cette cause, qu'ils n'ayent au prealable iustifié par bons actes, autorisez és Cours souueraines, leur legitime reception en France, & l'allegation de prescription ne leur peut de rien seruir, par ce que le temps pour icelle n'y est pas, & qu'elle ne sçauoit auoir bonne foy ny autre fondement legitime.

A laquelle assignation est comparu Maistre Chrystophe Bernier, Aduocat, & conseil de Maistre Charles Galiot, Bachelier en Theologie, Professeur en Philosophie en l'Vniuersité de Paris, Prieur Commendataire du Prieuré S. Martin lez Nyort, lequel nous a dit qu'il a rendu vn appointment par correction ausdits Peres Iesuittes & Palosse, qui contient les qualitez des parties & leurs conclusions, c'est pourquoy il soustient qu'il doit estre de nous signé, & non celuy offert par ledit Dumoley audit nom, & dit, que l'on ne sçauoit contester avec iustice les qualitez dudit Galiot, telles qu'elles sont cy-dessus quartées & qu'il a presentement, c'est pourquoy il conclud & demande despens.

Surquoy nous Commissaire susdit auons ausdits Dumoley, Cornier & Bernier esdits noms, donné acte de leurs

comparitions, direz y contenus, & ordonné que l'appointement de Reglement offert de la part dudit Dumoley audit nom, sera de nous signé, sans que les qualitez portées par iceluy, puissent nuire ny prejudicier aux parties, & sauf ausdits Cornier & Bernier ausdits noms, d'y faire inserer leurs direz si bon leur semble, & soit signifié. Fait en nostre Hostel à Paris, le dit iour & an susdit : Signé A M E L O T
G O V R N A Y.

Pour coppie, D V M O L E Y.

Signifié audit Maistre Cornier, Aduocat de partie aduerse, le vingt-neufvième Decembre mil six cens soixante & cinq, par moy, Signé P O I C T E V I N.